



UKA16/101  
9. oktober 2016  
Múte Bourup Egede

**Danmarkip naalagaaffiata inatsisaata tunngaviusup § 42-ni ikinnerussuteqartunik illersuinissamut aalajangersakkamut aallaaviatigut naapertuuttumik Inatsisartuni inatsisissatut siunnersuummik akuerineqarsimasumik, pisut aalajangersimasut ataasiakkaat minillugit, Inatsisartuni ikinnerussuteqartunit minnerpaamik ilaasortat pingajorarterutaannik amerlassusilinnit innuttaasunik taasititsissutigineqarsinnaanissaanik aalajangiisoqarsinnaanissaanik Naalakkersuisut UPA2017-imut inatsisissatut siunnersuusioqqullugit peqquneqarnissaannik Inatsisartunut aalajangiiffissatut siunnersuut.**  
(Inatsisartuni ilaasortaq Peter Olsen, Inuit Ataqatigiit)

Ullugut allanngorartuarput ineriartorfiujuarlutik. Inuunerput alakkaamasaqarnitsigut misilittagaqaraluttuinnarnitsigullu immersortuarparput nutarterfigalugu. Inuiattut ataatsimoorfeqarnitsigut toqqammavississimavarput, inuuneq naleqqussarnitsigut nutarterfiusoq ineriartorfiusorlu.

Inuit Ataqatigiit isumaqarput tamat oqartussaanerata, demokratii, Kalaallit Nunaanni pigisarput eriagalugulu ineriartortittuagassarigipput. Isumaqarpuguttaaq inuunitsituulli demokratii ullunut atuuttunut naleqqussarlugu pisariaqarpallu nutartersinnaanissaa oqallisigissallugu tunuarsimaarfisassanngikkipput. Taamaammata aaliangiiffissatut siunnersuuteqartoq, Inatsisartunut ilaasortaq Peter Olsen qutsavigaarput, soqutiginartumik nunatsinni tamat oqartussaanerata maani Inatsisartutigit oqallisiginissaanut periarfissiimmatigit.

Nunatsinni tamat oqartussaanerannik maanna aaqqissuusaanitsitut ingerlanerput, nunani tamalaanut killernut sanilliutissagaanni, aqutseriaaseq taanna ukiorpassuunngitsuni uagut atorsimavarput. Taamaakkaluortoq aqutseriaatsip taassuma atulerneraniilli ineriartorsimaqaagut.

Ukiut kingullit qulit assersuutigiinnavillugu qiviarutsigit, tamat oqartussaanerannut ineriartorfiusimasut kalluaasimasullu annertuujupput, soorlu kommunetoqqat atorunnaarlugit kommunerujussuannngortitsisimavugut Namminersornerlu nunatta namminiillivinnissaanut alloriarfik kingulleq aamma alloriarfigisimallutigu.

Naalakkersuisut siunnersuuteqartumut akissuteqaammuni eqqaavaat siunnersuummut uunnga assingusumik 1992-imi Inatsisartut itigartitaminnik oqalliseqarsimasut. Taamak nassuiaariarlutik allapputtaaq taamanimiit maannamut pissutsit amerlasuut tamallu oqartussaanerannik nalileeriaaserput allanngorsimasut. Naalakkersuisut taamak isummersornerat isumaqatigaarput.

Inuit Ataqatigiit pingaartutut isigaat siunnersuummi periarfissinneqarniartoq, tassalu Inatsisartuni ikinnerussuteqartunit minnerpaamik ilaasortat pingajorarterutaannik amerlassusilinnit apeqqutini aaliangersimasuni innuttaasunik taasititsinissamik piunarsaarsinnaalernissaat, sukumiisumik oqallisigineqartariaqartoq. Sukumiisumik oqallinnissatsinni eqqumaffigisassatut isigisatta ilagaat nunatsinni parteeqarmat marlunnik kingullertigit Inatsisartunut qinersinerni innuttaasut pingajorarterutaannit taaguunneqartartunik. Partiit pineqartut ukiuni kingullerni nikerarlutik Naalakkersuisunngortitsisarsimapput. Pissutsit nunatsinni taamaatsillugit isumaqarpugut

# INUIT ATAQATIGIIT

## INATSISARTUNI



siunnersuut oqallisigisarput piviusunnigortinneqassappat Inatsisartuni partii ataaseq kisimi innuttaasut taasitinneqarnissaanik kissateqarsinnaasassanngitsoq.

Illuatungaanili tulluarnerusorarpur ikinnerussuteqartunit partiit marluk pingasulluunniit ikinnerussuteqartut aatsaat piumasaqaraangata innuttaasunik taasititsinnaasarneq periarfissaasinnaasassasoq.

Siunnersuummi oqallisissaqqissut amerlammata, siunnersuut soqutiginarloq Inatsisinut ataatsimiitsitaliami sukumiisumik suliassanngorlugu ingerlateqqipparput.